

- देश रो सालाना रक्षा उत्पादन चालता रोकड़ बरस मांय 1 लाख 51 हजार करोड़ रिप्यां रा रिकॉर्ड थर माथे पूर्यो।
- भाई—बहन रा असीम दुलार अर सामाजिक समरसता रा तिवार रक्षाबंधन माथे उमाव रो माहौल।
- विश्व आदिवासी दिवस रे मौके प्रदेश मांय न्यारा—न्यारा आयोजनां री मार्फत जल, जंगल अर ज़मीन संरक्षण मांय आदिवासी समुदाय री कोशिशों ने नमन।
- हर घर तिरंगा अभियान ने जन आंदोलन बणावण सारू बत्ती ऊं बत्ती लोगां री भागीदारी तैय करी जावे।

000

देश रो सालाना रक्षा उत्पादन ई रोकड़ बरस मांय रिकॉर्ड थर माथे पूग ग्यो है। ओ एक लाख 51 हजार करोड़ रिप्यां रा थर ने पार कर लिया है। आ कामयाबी लारला रोकड़ बरस रा एक लाख 27 हजार करोड़ रिप्यां रा उत्पादन री तुलना मांय 18 फीसदी बत्ती है। रक्षा मंत्री राजनाथ सिंह इण री सराहवना करता कह्यो के ओ रक्षा औद्योगिक आधार री मज़बूती रो साफ़ संकेत है। वठे ई भारत रो रक्षा निर्यात लारला साल साल 23 हजार करोड़ रिप्यां रह्यो। इण रे आवता दो—तीन सालां मांय इण रे दुगणो होवण री आस है। रक्षा अनुसंधान अर विकास महकमां रा सचिव डॉ. समीर कामत आज पूणे मांय खबरनवीसा सागे बतळ करी। वणा कह्यो के आथूणी एशिया, अफ्रीका अर दिखणाद एशियाई देशां मांय भारतीय रक्षा उपकरणां री घणी मांग है। श्री कामत बतायो के मिसाइल अर उपकरण उत्पादन मांय संपूर्ण आत्मनिर्भरता हासिल करण सारू उद्योग अर शैक्षणिक संस्थानां री मदद ऊं 15 उत्कृष्टता केंद्र थापित कर्या जावे।

000

भाई—बहन रा असीम दुलार अर सामाजिक समरसता रो तिवार राखी बंधन आज रित मुजब उमाव रे साथे मनायो जावे। संवारां ऊं ई घरां मांय उमाव रो माहौल बण्यो है। बहनां भाईयां री कलाई राखियां ऊं सजायी अर वां री लंबी उम्र री कामना करी। भाईयां ई आप री बहनां ने हिफाजत रो वचन अर निजराना दिया। टाबरां ने ले र बड़ा ताई ई भावना ऊं जुड़्या पावन पर्व रो आनंद लेवे। भारतीय संस्कृति रा ई तिवार माथे राज्यपाल हरिभाऊ बागडे ने रक्षा सूत्र बांधण सारू केई बालिकावां अर ब्रह्माकुमारी ई राजभवन पूगी। वठे ई मुख्यमंत्री भजनलाल शर्मा आज आप रा रहवास माथे वीरांगनावां, सामाजिक कार्यकर्तावां, वकीलां अर न्यारा—न्यारा हलकां ऊं जुड़ी महिलावां अर पढेसरां ऊं रक्षा सूत्र बंधवाया। उपमुख्यमंत्री दिया कुमारी दक्षिण—पश्चिम कमान मुख्यालय मांय सैनिकां रे साथे रक्षाबंधन मनायो। दिया कुमारी उपमुख्यमंत्री डॉ. प्रेमचंद बैरवा रे ई वां रा रहवास माथे जा र राखी बांधी। लोकसभा अध्यक्ष ओम बिरला कोटा मांय आप रा रहवास माथे रक्षा बंधन मनायो। वणा आदिवासी महिलावां ऊं रक्षा सूत्र बंधवाया। वठे ई ऊर्जा मंत्री हीरालाल नागर रे वीरांगना राखी बांधी। रक्षा बंधन रे मौके घणी तादाद मांय महिलावां अर बालिकावां रोडवेज री बसां मांय मुफ्त जातरा रो फायदो लियो। हनुमानगढ़ रा टिब्बी रा सरकारी कॉलेज री छात्रा दो दिन री ई सौगात सारू मुख्यमंत्री रो आभार जतायो।

.....

पाली रा बाली मांय कैदियां रे ब्रह्मकुमारी बहनां राखी बांधी। इण रे साथे ई कैदियां अपराध छोड़ण अर जीवन मांय बदलाव लावण रो संकल्प लियो। चूरू, झुंझुनूं, सीकर समेत केई ठौड़ां बहनां अर वीरांगनावां शहीदा री मूरत रे राखी बांध ने वां री याद ने जीवत कर्या।

.....

कोटपूतली—बहरोड़ मांय रक्षाबंधन रा तिवार माथे पुलिस अधीक्षक देवेन्द्र कुमार विश्नोई सड़क सुरक्षा रा संकल्प रो संदेश दियो। रक्षाबंधन रा तिवार माथे कई ठौड़ां कौमी एकता री मिसाल ई देखण ने

मिली। बाड़मेर ऊं म्हाणा खबरनवीस बतायो के शिव हलकां मांय खेजड़ी रा पेड़ां रे राखी बांध ने पर्यावरण संरक्षण रो संदेश दीरीज्यो।

.....

अंतर्राष्ट्रीय भारत-पाक सरहद माथे बहनां बी.एस.एफ. रे राखी बांध ने सन्मान प्रकट कर्यो। अलवर मांय ई मौके पतंग उड़ावण री रीत निभाई जावे। फ़ैरू ई बिरखा रे करण पतंगबाजी नी करी ज्यी।

000

प्रधानमंत्री नरेंद्र मोदी आज काकोरी घटना रा क्रांतिकारियां ने सिरधानजली अर्पण करी। एक सोशल मीडिया पोस्ट मांय श्री मोदी कह्यो के सौ साल पैला आज रे ही दिन काकोरी मांय देशभक्त भारतीयां साहस रो परिचय देवता औपनिवेशिक शासन रे खिलाफ़ रोष उजागर कर्यो। प्रधानमंत्री कह्यो के वां री वीरता ने देश हमेश याद राखेला।

000

विश्व आदिवासी दिवस माथे राज्य थर रो जळसो डूंगरपुर रा सागवाड़ा मांय व्ह्यो। जनजातीय क्षेत्रीय विकास महकमां कानी ऊं ओ कार्यक्रम महिपाल मैदान मांय व्ह्यो। जळसा मांय अतिरिक्त मुख्य सचिव कुंजीलाल मीणा कह्यो के केन्द्र अर राज्य सरकार आदिवासियां रा कल्याण सारू प्रतिबद्ध है। वणा मुख्य धारा ऊं जोड़न सारू केई योजनावां चलायी जावे।

.....

लोकसभा अध्यक्ष ओम बिरला कोटा मांय वीर कोट्या भील री मूरत माथे माळा अर्पण कर ने वां रा योगदान ने नमन कर्या। ई मौके वणा कह्यो के कोट्या भील आदिवासी समाज रा आत्मसम्मान अर हकां री हिफाजत सारू आखी जिन्दगी संघर्ष कर्यो। मीडिया ऊं बतळ करता वणा कह्यो के जल, जंगळ अर ज़मीन सारू वां रा योगदान ने हमेश याद राख्या जायेला।

.....

बाड़मेर मांय रैली निकाळी ज्यी अर आदिवासी समुदाय री प्रतिभावां रो सनमान करी ज्यो। उठिने, बांसवाड़ा मांय राजा बांसिया भील री मूरत माथे माळा अर्पण कर गेर नृत्य करी ज्यो। बागीदौरा, कुशलगढ, घाटोल, गढ़ी अर दानपुर समेत गांवाई हलकां मांय भी केई कार्यक्रम व्ह्या। ई मौके पाली मांय नशा मुक्त समाज री शपथ लीरीजी।

000

जैसलमेर जिला रा रामदेवरा मांय संस्कृत दिवस रे मौके जनजागरुकता रैली निकाळी ज्यी। ई मौके श्री बाबा रामदेव राजकीय वरिष्ठ उपाध्याय संस्कृत विश्वविद्यालय मांय पढेसरां सांस्कृतिक कार्यक्रम ई प्रस्तुत कर्या। सिरोही रा आदिवासी बाहुल हलका पिंडवाड़ा मांय ई रैली निकाळी ज्यी। इण मांय घणी तदाद मांय मिनख रीत मुजब पोषाक धारण करण ने भेळा व्ह्या।

000

हर घर तिरंगा अभियान रे तैत प्रदेश मांय न्यारा-न्यारा आयोजन व्हे रिया है। 2 अगस्त ऊं शुरू व्ह्यो ओ अभियान 15 अगस्त ताई तीन चरणां मांय मनायो जावे। इण मांय लोगां ने घरां, दफ़तरां, संस्थानां अर सार्वजनिक ठौड़ां स्वतंत्रता दिवस रे मौके राष्ट्रीय ध्वज फहरावण सारू बधावो दियो जावे। ई अभियान ने जन आंदोलन बणावण सारू बत्ती ऊं बत्ती लोगां री भागीदारी तैय करी जावे। इण रे साथै ई तिरंगा जातरावां, ऐतिहासिक थळां री सफ़ाई अभियान अर शहीदां री वीरांगनावां अर पिरवारजणा रो सनमान करण रा कार्यक्रममां री रूपरेखा तियार करी जावे।

ई कडी मांय पाली मांय ज़िला मुख्यालय रा न्यारा-न्यारा चौराहां अर भवनां ने तिरंगी थीम माथे सजायी ज्यो है। सिरोही मांय अभियान ने कामयाब बणावण सारू लोगां ने सक्रिय भागीदारी सारू प्रेरित कर्या जावे।

000

प्रदेश रा कुछ हलकां मांय मॉनसून एकर फ़ैरू रफ़तार पकड़ ली है। मौसम मेहकमो आज अलवर, दौसा, भरतपुर अर धौलपुर ज़िला सारू बिरखा रो येलो अलर्ट काड्यो है। ई बीचे, भरतपुर मांय संवारां एक घंटा ताई मूसलाधार बिरखा व्ही। करौली ज़िला रा टोडाभीम अर हिंडौन अर आरे-सारे रा हलकां मांय रिमझिम बिरखा दर्ज व्ही। राजधानी जैपर समेत केई हलकां मांय बादळ छाथी ज्यो रिया।

राष्ट्रीय लोकतांत्रिक पार्टी प्रमुख अर नागौर सांसद हनुमान बेनीवाल आज रेल मंत्री अश्विनी वैष्णव ऊं मिल्या। ई दौरान वणा नागौर संसदीय हलका मांय रेलसेवा ऊं जुड्या न्यारा-न्यारा मुद्दा माथे चर्चा करी।

श्री बेनीवाल बीकानेर ऊं नागौर व्हेता दिल्ली जावण वाळी संपर्क क्रांति एक्सप्रेस ने रोज चलावण री ई मांग करी। इण रे साथे ई मकराना, लाडनूं, कुचामन सिटी अर दूजा रेलवे टेशनां ने अमृत भारत स्टेशन योजना मांय भेळा करण री बात ई राखी।